

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
Kantonalni štab civilne zaštite
Broj: 02/24-44-2198-24/12
Tuzla, 24.02.2012. godine.

INFORMACIJA

o poduzetim aktivnostima u vrijeme proglašenja stanja prirodne nesreće na području Tuzlanskog kantona uzrokovane velikim snježnim padavinama i niskim temperaturama, u periodu od 05.02.2012. do 22.02.2012. godine

UVOD

Područje čitavog Tuzlanskog kantona (TK) zahvaćeno je krajem januara i početkom februara 2012. godine obilnim snježnim padavinama, te se u vrlo kratkom vremenskom periodu, formirao visoki snježni pokrivač, koji je na području većeg broja općina dostigao visinu preko 50 cm. Načelnik općine Kladanj je 25.01.2012. godine, donio Odluku o proglašenju stanja prirodne nesreće od visokog snijega i snježnih nanosa.

Dana 04.02.2012. godine, održana je sjednica Općinskog štaba civilne zaštite (OŠCZ) Tuzla, na kojoj je razmotrena trenutna situacija na području općine, sa aspekta zaštite i spašavanja ljudi i materijalnih dobara, usljed obilnih snježnih padavina. Zaključeno je da je stanje veoma teško te je na prijedlog OŠCZ, načelnik općine donio Odluku o proglašenju stanja prirodne nesreće.

Obzirom da je situacija na području cijele Federacije Bosne i Hercegovine (FBiH), iz istih razloga veoma složena, Vlada FBiH je na prijedlog Federalnog štaba civilne zaštite (FŠCZ), donijela Odluku o proglašenju stanja prirodne nesreće na području FBiH, uzrokovane velikim snježnim padavinama i niskim temperaturama (broj: 03/05-02-130712 od 04.02.2012. godine).

Imajući u vidu veoma tešku situaciju na području Hercegovačko-neretvanskog kantona (HNK), FŠCZ je donio Naredbu o angažiranju svih raspoloživih resursa, pravnih lica i privrednih društava, za raščišćavanje puteva od velikih snježnih nanosa na području HNK.

Na osnovu dobivenih Odluka i Naredbi iz FŠCZ, dana 04.02.2012. godine, komandant i načelnik Kantonalnog štaba civilne zaštite (KŠCZ) su u prostorijama Kantonalne uprave civilne zaštite (KUCZ), održali radni sastanak sa dijelom uposlenika KUCZ. Odlučeno je da se od svih OŠCZ na području TK, zatraži detaljna Informacija o trenutnom stanju na terenu kao i o raspoloživoj opremi i sredstvima za zimsko raščišćavanje puteva i transport takve opreme. Za 05.02.2012. godine je zakazana 1. vanredna sjednica KŠCZ.

Dana 05.02.2012. godine je održana Sjednica stručnog kolegija KUCZ. Na osnovu informacija koje su stigle od svih OŠCZ, sačinjena je Informacija o ugroženosti ljudi i materijalnih dobara od visokog snijega i snježnih nanosa na području TK. Prema prikupljenim informacijama, svi lokalni, regionalni i magistralni putevi na području TK su prohodni. Nema zavejanih ili zametanih naselja, saobraćaj se odvija otežano, posebno na planinskim prevojima, i pored brze intervencije službi za održavanje puteva. Nema većih problema u snabdijevanju električnom energijom. Telefonski saobraćaj se odvija neometano. Gradski i prigradski saobraćaj se odvija po redu vožnje za zimski školski raspust. I pored obilnih snježnih padavina, nije došlo do većeg porasta nivoa vodotoka, što bi za posljedicu imalo ugrožavanje ljudi i materijalnih dobara uslijed poplava.

Načelnik općine Sapna je 05.02.2012. godine, donio Odluku o proglašenju stanja prirodne nesreće od snježnih padavina i niskih temperatura na području općine Sapna.

AKTIVNOSTI U VRIJEME PROGLAŠENJA STANJA PRIRODNE NESREĆE NA PODRUČJU TUZLANSKOG KANTONA UZROKOVANE VELIKIM SNJEŽNIM PADAVINAMA I NISKIM TEMPERATURAMA

Prva vanredna sjednica KŠCZ održana je u nedjelju, 05.02.2012. godine u 12,00 sati. Na sjednici je razmatran slijedeći dnevni red:

1. Upoznavanje sa Odlukom o proglašenju stanja prirodne nesreće na području FBiH uzrokovane velikim snježnim padavinama i niskim temperaturama
2. Informacija o ugroženosti ljudi i materijalnih dobara od snijega i snježnih nanosa na području TK
3. Tekuća pitanja

Nakon što je izvršena detaljna analiza stanja na terenu, KŠCZ je u skladu sa Naredbom FŠCZ, donio **Naredbu o angažovanju građevinskih mašina** koje mogu raditi na raščišćavanju snježnih nanosa na putu M-17, na području Hercegovačko-neretvanskog kantona. Za realizaciju Naredbe obavezuje se pravno lice DOO „Grimig“ Doboj Istok, da ODMAH uputi:

1. mašinu - utovarivač VOLVO sa plugom i kašikom i sa osobljem
2. Kamion SCANIA sa tri osovine za transport utovarivača.

Sve troškove angažovanja vozila i rukovaoca istih snosi Federalni štab civilne zaštite, u skladu sa Naredbom Federalnog štaba civilne zaštite.

Također, KŠCZ je na 1. vanrednoj sjednici donio slijedeće **zaključke**:

1. Zbog visokih snježnih padavina i niskih temperatura na području TK je došlo veoma otežane komunikacije i korištenja putne infrastrukture kao i normalnog odvijanja života zbog čega je na općinama Kladanj, Tuzla i Sapna proglašeno stanje prirodne nesreće.

KŠCZ predlaže Vladi TK da donese Odluku o proglašenju stanja prirodne nesreće zbog visokog snijega i niskih temperatura.

2. KŠCZ je preporučio Ministarstvu obrazovanja, nauke, kulture i sporta da se zbog najave novih snježnih padavina i niskih temperatura obustavi nastava u osnovnim i srednjim školama na području TK.

3. Nalaže se OŠCZ da, u skladu sa svojom ulogom i zakonom utvrđenim nadležnostima, u potpunosti preuzmu poslove rukovođenja akcijama zaštite i spašavanja na području svojih općina.

4. Zbog pojačane potrošnje električne energije, traži se od menadžmenta rudnika da preuzmu potrebne mjere da se održi i po mogućnosti uveća dostignuti nivo proizvodnje uglja i njegova isporuka TE Tuzla.

5. Zbog negativnog uticaja niskih temperatura na transport uglja željeznicom do TE Tuzla, nalaže se MUP-u TK da preuzme potrebne aktivnosti kako bi se kamionski transport uglja od rudnika do TE Tuzla obavljao bez zastoja u saobraćaju.

6. Pozivaju se građani i pravna lica da u skladu sa obavezama utvrđenim Zakonom o zaštiti i spašavanju ljudi i materijalnih dobara uzmu aktivno učešće u uklanjanju snijega ispred objekata stanovanja, odnosno poslovnih objekata koje koriste.

Razmatran je prijedlog Kantonalne komisije za procjenu šteta, po zahtjevu za dodjelu interventne pomoći općinskog načelnika Kladnja, upućenog po proglašenju stanja prirodne nesreće od visokog snijega i snježnih nanosa. Obzirom na intenziviranje prirodne nesreće od visokog snijega i snježnih nanosa na ovoj općini, KŠCZ je prihvatio prijedlog Kantonalne komisije za procjenu šteta i donio **Odluku da se općini Kladanj dodijeli interventna pomoć u iznosu od 10.000,00 KM** iz sredstava posebne naknade tekućeg priliva (prihod 4), planiranih na budžetskoj poziciji KUCZ na kontu 614100 – Tekući transferi drugim nivoima vlasti, u dijelu plana rashoda vlastitih namjenskih prihoda, u Odluci o privremenom finansiranju.

Kantonalni štab je upoznat da je Stručno savjetodavno tijelo za zaštitu zdravlja stanovništva na području Tuzlanskog kantona održalo hitan sastanak 04.02.2012. godine, ostvarilo kontakte sa odgovornim osobama u svim zdravstvenim ustanovama i utvrdilo stanje resursa, organizaciju i potrebe zdravstvene zaštite u navedenim okolnostima. Prema utvrđenom, zdravstvena zaštita na terenu se odvija normalno. Zdravstvene ustanove u ovom momentu raspolažu svim neophodnim resursima za osiguranje adekvatne zdravstvene zaštite (raspoloživost medicinskog kadra, opskrbljenost lijekovima i medicinskim sredstvima, raspoloživost transportnih sredstava, energenata i dr.). Osigurana je dostupnost hitne medicinske pomoći, nesmetan program hemodijalize i standardna bolnička zdravstvena zaštita u dane vikenda a više se aktivnosti na osiguranju nesmetanog funkcioniranja primarne zdravstvene zaštite u svim ambulancama na području TK u radne dane naredne sedmice.

Kantonalni štab je upoznat da je Crveni križ TK poduzeo aktivnosti kako bi se odgovorilo na potrebe građana koji su ugroženi velikim snježnim padavinama i niskom temperaturama. Sve aktivnosti se poduzimaju u saradnji sa službama i štabovima CZ. Volonteri Crvenog križa obilaze ugrožene porodice i pojedince.

Ministarstvo industrije, energetike i rudarstva TK prati situaciju na terenu i u stalnom je kontaktu sa pravnim subjektima na području kantona. Uslijed povećane potrošnje električne energije, maksimalne proizvodnje termoelektrane "Tuzla" i otežane dopreme novih količina uglja, na depovima termoelektrane su znatno smanjene količine ovoga energenta. Zbog izrazito loših vremenskih uslova otežan je i transporta uglja unutar termoelektrane. Dodatni problem predstavljaju otežani uslovi za rad u rudnicima.

Vlada TK je na vanrednoj sjednici održanoj 05.02.2012. godine, na prijedlog KŠCZ, donijela **Odluku o proglašenju stanja prirodne nesreće na području Tuzlanskog kantona uzrokovane visokim snježnim padavinama i niskim temperaturama (broj: 02/1-44-2127/12 od 05.02.2012. godine).**

Obzirom na složenost situacije u općini Kladanj, premijer TK, komandant i načelnik KŠCZ su posjetili općinu Kladanj, gdje su obavili razgovor sa načelnikom općine i predstavnicima službe civilne zaštite.

Mehanizacija sa posadom, koja je u skladu sa naredbom Kantonalnog štaba o pružanju pomoći HNK, upućena prema Konjicu, oko 22,00 sata je stigla na odredište.

Od momenta proglašenja prvog slučaja prirodne nesreće (općina Kladanj), Federalna uprava civilne zaštite stavila je na raspolaganje KŠCZ terenska vozila deminerskih timova civilne zaštite sa dežurnim vozačima koji su bili na raspolaganju svakog dana. Pored prevoza pripadnika KŠCZ i KUCZ najveći angažman je zabilježen na dostavi pomoći (paketi obezbjeđeni preko Crvenog križa TK i Ministarstva za rad socijalnu politiku i povratak) najudaljenijim stanovnicima na cijelom području TK.

Tokom 06.02.2012. godine palo je u prosjeku oko 10 cm novog snijega na području TK. Nije bilo većih problema u snabdjevanju električnom energijom, interventne ekipe Elektroprivrede su sanirale manje kvarove. Dana 06.02.2012. godine, oko 19 sati došlo je do prekida u napajanju električnom energijom na području općine Kladanj, u MZ Tuholj radi kvara na 10 kV dalekovodu. Kvar je otklonjen u jutarnjim satima narednog dana. U Banovićima je došlo do kvara na postrojenjima gradske toplane, te je gradski dio općine ostao bez centralnog grijanja.

Komandant KŠCZ Aziz Čačković, načelnik KŠCZ Zdenko Tadić i članovi KŠCZ Željko Knežiček, Bego Gutić i Senija Bubić su obavili posjetu TE Tuzla, gdje su se u razgovoru sa direktorom TE Tuzla Fadilom Nadarevićem, upoznali sa problemima u snabdjevanju termoelektrane neophodnim energentima.

Službenici KUCZ Tuzla i pripadnici TUN tima FUCZ su izvršili prevoz pomoći koju je pripremio Crveni križ TK, za ugrožene porodice na području općina Tuzla i Sapna. Službenici KUCZ Tuzla i članovi KŠCZ su, radi utvrđivanja stanja na terenu, obišli općinu Sapna, gdje su se u razgovoru sa načelnikom općine Sapna Ismetom Omerovićem upoznali sa aktuelnom situacijom u ovoj općini. Također, posjetili su općinu Kalesija.

Načelnik općine Čelić je dana 06.02.2012. godine, donio Odluku o proglašenju stanja prirodne nesreće na području općine.

Druga vanredna sjednica KŠCZ održana je u utorak, 07.02.2012. godine u 11,00 sati. Na sjednici je razmatran slijedeći dnevni red:

1. Upoznavanje i analiza stanja na terenu
2. Upoznavanje i primjena naredbi FŠCZ
3. Tekuća pitanja

Nakon vođene konstruktivne diskusije, u kojoj su učešće uzeli svi prisutni, donesene su slijedeće **naredbe**:

"Zadužuju se Općinski štabovi civilne zaštite i menadžment zdravstvenih ustanova na području Tuzlanskog kantona da odmah pristupe organizaciji uklanjanja snijega oko objekata zdravstvenih ustanova i izvještaj o realizaciji naredbe dostave u Kantonalni štab civilne zaštite najkasnije do 08,00 sati 08.02.2012. godine".

"Zadužuju se JP 'Spreča' da uskladi režim rada hidroakumulacije 'Modrac' kako bi se mogao bez težih posljedica prihvatiti priliv vode koji se može dogoditi naglim topljenjem snijega na općinama uzvodno od hidroakumulacije i informaciju o poduzetim aktivnostima dostave u Kantonalnu upravu civilne zaštite".

"Dozvoljava se kretanje vozilima sa prikolicama, šleperima i cisternama na području Tuzlanskog kantona, kojima se vrši prevoz nafte, naftnih derivata, lož ulja, uglja i drugih energenata, kao i drugih vozila koja prevoze hranu i druge neophodne proizvode za život i zdravlje stanovništva, kao i proizvode privrednih subjekata za izvoz (ugovorne obaveze prema inostranstvu) i sve drugo što je vezano za provođenje mjera zaštite i spašavanja ljudi i materijalnih dobara u stanju proglašene prirodne nesreće. Za realizaciju ove Naredbe zadužuje se Ministarstvo unutrašnjih poslova Tuzlanskog kantona, pri čemu će prvenstveno voditi računa o trenutnom stanju na putevima i njihovoj prohodnosti (propusnosti na određenim dionicama)."

Članovi KŠCZ su upoznati da je u KUCZ određeno dežurstvo za vrijeme trajanja stanja prirodne nesreće na području TK po rasporedu koji će se utvrditi u Kantonalnoj upravi.

Načelnik općine Živinice je dana 07.02.2012. godine donio Odluku o proglašenju stanja prirodne nesreće na području općine.

U periodu od 08.02.2012. – 10.02.2012. godine nisu zabilježene nove snježne padavine na području Tuzlanskog kantona, ali su zabilježene izuzetno niske jutarnje temperature, koje su bile i niže od -20°C. Dnevne temperature su se kretale oko -10°C. Svi putevi na Tuzlanskom kantonu su prohodni, uz otežano odvijanje saobraćaja. Na području cijelog kantona se obavljaju radovi na uklanjanju snijega.

Načelnik općine Banovići je dana 08.02.2012. godine donio Odluku o proglašenju stanja prirodne nesreće na području općine, tako da je stanje prirodne nesreće proglašeno na području Tuzlanskog kantona, kao i u 6 općina: Banovići, Čelić, Kladanj, Sapna, Tuzla i Živinice.

Na općinama Doboj Istok, Gračanica, Gradačac, Kalesija, Lukavac, Srebrenik i Teočak nije proglašavano stanje prirodne nesreće od strane općinskih načelnika ali su OŠCZ, u skladu sa proglašenjem stanja prirodne nesreće na razini Federacije BiH i TK, aktivirani i svo vrijeme aktivno sudjelovali u rukovođenju akcijama zaštite i spašavanja i provođenju naredbi FŠCZ i KŠCZ na svom području.

Zabilježena je prva žrtva velike hladnoće na našem kantonu. Dana 08.02.2012. godine ispred porodične kuće u snijegu pronađen je mrtav muškarac star četrdeset sedam godina iz Treštenice, kod Banovića. Smrt je konstatovao dežurni ljekar Doma zdravlja Banovići, a dežurni tužilac nije naredio da se obavi obdukcija, s obzirom da je evidentno da je smrt nastupila usljed smrzavanja.

Vodostaj na brani HA Modrac je svakodnevno u opadanju za 5 do 10 centimetara, pa je tako 10.02.2012. godine u 07,00 sati vodostaj iznosio 197,61 m.n.m., dok je ispušt kroz temeljne otvore brane 16,2 m³/s.

Nema značajnijih prekida u napajanju električnom energijom i u telefonskim vezama. Dežurne ekipe su na terenu i otklanjaju manje kvarove izazvane velikom hladnoćom. Vodosnabdjevanje stanovništva se odvija otežano zbog brojnih kvarova koji se dešavaju uslijed smrzavanja cjevovoda, kako u domaćinstvima i zajedničkim dijelovima stambenih objekata, tako i u glavnim cjevovodima koji vode prema visinskim naseljima.

U Banovićima je sistem centralnog grijanja djelomično osposobljen, tako da veći dio grada ima grijanje, ali je nekoliko objekata, među kojima i osnovna i srednja škola, bez grijanja.

Načelnik KŠCZ Zdenko Tadić i član KŠCZ Bego Gutić su posjetili općinu Banovići, te nakon razgovora sa načelnikom općine Begom Birparićem, obavili obilazak općine.

Komandant KŠCZ Aziz Čačković, načelnik KŠCZ Zdenko Tadić i ministar za rad, socijalnu politiku i povratak Sead Hasić su posjetili općinu Čelić, gdje su razgovarali sa načelnikom OŠCZ Čelić Nerminom Okanovićem, te izvršili obilazak općine. Također, posjetili su općinu Teočak te razgovarali sa načelnikom općine Taibom Muminovićem i obišli nekoliko lokacija na području općine.

Članovi KŠCZ i službenici KUCZ su obavili posjete općinama Doboj Istok, Gračanica, Lukavac, Srebrenik i Gradačac.

Predstavnici Crvenog križa TK su u saradnji sa Općinskim organizacijama Crvenog križa, KŠCZ i OŠCZ realizovali brojne akcije pomoći najugroženijim porodicama i pojedincima. Dostavljeni su paketi sa hranom, lijekovima, sredstvima za higijenu, čebadi, ogrjev, čišćenje pristup do porodičnih kuća. Također su pomagali oko zbrinjavanja beskućnika. Akcije se vode na svim općinama TK. U više navrata su Službe CZ intervenirale kako bi se omogućio pristup ljekarima do bolesnih i onih kojima je potrebna pomoć.

Treća vanredna sjednica KŠCZ održana je u petak, 10.02.2012. godine sa početkom u 14,00 sati u prostorijama brane hidroakumulacije Modrac. Na sjednici je razmatran slijedeći dnevni red:

1. Izvodi iz zapisnika sa 1. i 2. vanredne sjednice KŠCZ
2. Upoznavanje i analiza stanja na terenu
3. Izvještaj o realizaciji naredbi KŠCZ
4. Informacija o aktivnostima organizacije CK općina TK.
5. Upoznavanje i primjena naredbi FŠCZ
6. Tekuća pitanja

Pod 3. tačkom dnevnog reda menadžment JP "Spreča" je prezentirao stanje na hidroakumulaciji jezera Modrac i predočio poduzete pripremne radnje, kako bi se spremno dočeka porast temperatura i nagli priliv vode, sa osvrtom na eventualne prijetnje plavljenja nizvodno od hidroakumulacije. KŠCZ je donio zaključak da je stanje upravljanja kapacitetom brane na hidroakumulaciji jezera Modrac u potpunosti pod kontrolom. Istaknuto je da ne postoji opasnost od slabljenja sigurnosti Brane na hidroakumulaciji Modrac, čija je stabilnost dodatno ojačana prošlogodišnjom rekonstrukcijom.

Članovi štaba su upoznati sa izvještajima koji su pristigli od OŠCZ i Javnih zdravstvenih ustanova, a koji su se odnosili na Naredbu KŠCZ o uklanjanju snijega oko objekata zdravstvenih ustanova. Zaključeno je da je većina subjekata, zaduženih Naredbom KŠCZ, ispoštovala obaveze na zadovoljavajućem nivou.

Ministarstvo unutrašnjih poslova Tuzlanskog kantona je dalo veliki doprinos i vanrednim angažiranjem svojih pripadnika na terenu omogućilo veoma efikasno provođenje svih naredbi KŠCZ, tako da se stanje prirodne nesreće u odvijanju putnog saobraćaja na području Tuzlanskog kantona, nije značajnije osjetilo.

Članovi štaba su informirani sa realizacijom naredbe KŠCZ, a koja je donijeta prema naredbi FŠCZ, koja se odnosi na upućivanje raspoložive mehanizacije za pomoć u rasčišćavanju puteva na području HNK. Tražena mehanizacija sa posadom je upućena na područje općine Konjic, dok je ostala raspoloživa mehanizacija u pripravnosti i koristi se kao ispomoć u čišćenju magistralnih puteva koji prolaze područjem TK.

Prezentirana je Informacija o aktivnostima kantonalne i općinskih organizacija crvenog križa tokom djelovanja prirodne nesreće. Crveni križ na području TK angažirao je 247 volontera, distribuirao je 921 paketa hrane i higijenskih sredstava, 32 m³ ogrijeva, 292 ćebeta, 11 spužvi i 4 madraca. Volonteri su pružili 1288 raznih usluga građanima i lokalnoj zajednici (čišćenje snijega, nabavka lijekova, priprema ogrijeva, odlazak ljekaru, smještaj u ustanove, priprema obroka i dr.). Upućene su riječi pohvale za sve poduzete aktivnosti volontera crvenog križa na pružanju pomoći najugroženijim kategorijama stanovništva.

KŠCZ je upoznat sa pristiglim naredbama FŠCZ i prijedlogom naredbe KŠCZ proisteklom po osnovu istih. Nakon vođene diskusije donesena je **naredba o normalizaciji saobraćaja na području TK:**

"U skladu sa situacijom na putnim pravcima na području Tuzlanskog kantona odobrava se kretanje svih prevoznih sredstava, uz obavezu pojačane kontrole poštivanja upotrebe propisane zimske opreme, od strane organa unutrašnjih poslova, radi normalizacije snadbijevanja i oživljavanja privrednih aktivnosti na području Tuzlanskog kantona.

Za realizaciju ove Naredbe zadužuje se Ministarstvo unutrašnjih poslova Tuzlanskog kantona, pri čemu će prvenstveno voditi računa o trenutnom stanju na putevima i njihovoj prohodnosti (propusnosti na određenim dionicama), kao i stanju na putevima koji su u maršuti putnih pravaca na ostalom području Federacije, te se u tom smislu ovlašćuje Ministarstvo unutrašnjih poslova da cijeni svaku situaciju pojedinačno, u smislu ove Naredbe, kao i Naredbe Federalnog štaba civilne zaštite, broj:11-49/1-53/12 od 09.02.2012. godine."

Pod tekućim pitanjima:

- Razmatan je zahtjev MUP TK-a na pružanju pomoći u gorivu zbog obavljanja izvanrednih poslova zaštite i spašavanja za vrijeme trajanja prirodne nesreće. Zahtjevu je udovoljeno i donesena je Odluka da se odobre sredstava za nabavku 1.000 litara goriva, za potrebe MUP TK, sa podračuna posebne naknade kojom raspolaže KŠCZ.

- Tražen je stav KŠCZ za nastavak redovnog izvođenja nastave na području Tuzlanskog kantona. Stav KŠCZ je da su se stekli uvjeti za početak nastave na području Tuzlanskog kantona.

- KŠCZ je zaključio da je potrebno putem medija uputiti **Upozorenje građanima** sljedećeg sadržaja:

"Upozoravaju se građani koji stanuju ili borave u blizini hidroakumulacije Modrac da je zbog pojačanog ispuštanja vode iz hidroakumulacije, između leda i vode došlo do stvaranja zračnog džepa, koji olakšava pucanje leda, pa je svako kretanje po zaleđenoj jezerskoj površini veoma opasno i može završiti tragično."

- KŠCZ je upoznat sa dopisom Federalne direkcije robnih rezervi u kome se pozivaju vlade kantona da upute zahtjev za pomoć u emergencijama za potrebe vođenja akcija zaštite i spašavanja na svom području. Zauzet je stav da se Vlada TK o istom izjasni nakon upoznavanja.

U toku 11.02.2012. godine, na području TK palo je 10-15 cm novog snijega. Svi magistralni i regionalni putevi su prohodni uz otežano odvijanje saobraćaja. Na području cijelog kantona se obavljaju radovi na uklanjanju snijega. Nema značajnijih prekida u napajanju el. energijom, vodom i telefonskim vezama.

U općini Banovići kvar na gradskom toplovodu nije otklonjen, tako da jedan dio grada Banovići još uvijek nema grijanje. Ekipe putne operative su upućene na čišćenje lokalnih putnih komunikacija i autobuskih linija od novih snježnih nanosa.

U općini Kladanj je dana 10.02.2012. godine, u 12,30 sati, uspješno završena spasilačka akcija u mjestu Hotani, općina Kladanj, u kojoj su učestvovali: OSCZ i doktor JZU "Dom zdravlja" Kladanj na pružanju medicinske pomoći i evakuaciji jednog pacijenta iz MZ Tuholj na UKC Tuzla, te pomoći u hrani i drugim proizvodima. Dostavljeni su paketi za osam porodica romske nacionalnosti te jedan paket za povratničku porodicu u naselju Starići.

Zbog opterećenja krovne konstrukcije velikom količinom snijega, popustio je krov na objektu skladišta gotovih proizvoda u DOO "Ramex" u naselju Gojakovići. Pričinjena je znatna materijalna šteta na vozilu koje je bilo parkirano unutar hale.

Općina Sapna Štab CZ Sapna je u suradnji sa Crvenim križom općine Sapne osigurao trideset paketa hrane i podijelio najugroženijim porodicama.

Općina Kalesija OSCZ Kalesija je izvršila probijanje puta Kalesija-Prnjavor-Čanići kako bi se obezbijedilo snabdjevanje hranom za sitnu stoku (nekoliko stotina ovaca), vlasništvo ovčara sa Vlašića koji zimuju u Sprečkoj dolini.

U toku noći 11/12.02.2012. godine palo je oko 10 cm novog snijega, što je uzrokovalo probleme u odvijanju saobraćaja, ali su angažmanom mehanizacije za čišćenje snijega svi magistralni, regionalni i lokalni putevi bili prohodni. Nije bilo značajnijih problema u snabdijevanju električnom energijom i telefonskom saobraćaju. Vodosnabdijevanje stanovništva je bilo otežano, zbog kvarova na vodovodnim instalacijama uslijed smrzavanja.

Kvar na sistemu centralnog grijanja u Banovićima nije u potpunosti otklonjen, tako da nekoliko objekata u gradu nema grijanje.

Uslijed težine snijega popustio je krov na jednom pomoćnom objektu – štali, u naselju Ravne, općina Kladanj kao i krov hale privatne firme "Tabić Trade", također u općini Kladanj.

Ministrica obrazovanja, nauke, kulture i sporta u Vladi TK Nađa Avdibašić Vukadinović, nakon konsultacija sa komandantom KŠCZ, načelnicima općina i direktorima škola, dana 12.02.2012. godine donijela je odluku da se nastava u svim osnovnim i srednjim školama na području Tuzlanskog kantona nastavlja u srijedu 15.02.2012. godine. U slučaju pogoršanja vremenskih prilika, učenici i škole će biti blagovremeno informirani o novom odlaganju nastave. Popravni ispitni rokovi koji su se trebali održati od 6. februara, a koji su prolongirani zbog vremenskih nepogoda, na svim fakultetima Univerziteta u Tuzli počinju u ponedjeljak 13. februara 2012 godine prema ranije utvrđenim rasporedima.

Dana 12.02.2012. godine, komandant KŠCZ donio **Naredbu:**

Uvidom u stanje na terenu dana 12.02.2012. godine, utvrđeno je da se zimsko održavanje puta M-18 na području Tuzlanskog kantona, za koji je prema ugovoru Federalne direkcije cesta zadužena firma "JATA GROUP" d.o.o. za održavanje i zaštitu puteva iz Srebrenika, ne vrši u skladu sa potrebama. Traži se od navedene firme da odmah pristupi kvalitetnijem čišćenju navedene dionice puta ili će u protivnom KŠCZ biti primoran da angažira dodatnog izvođača na račun navedene firme. Izjašnjenje o navedenom hitno dostaviti do 17,00 sati KŠCZ zaštite preko Kantonalnog operativnog centra u Tuzli.

Postupajući po Naredbi, "Jata Group" DOO Srebrenik je dostavio Izjašnjenje u kojem se navodi da su od 15.11.2011. angažirani na zimskom održavanju magistralnih cesta te da od tog dana na punktovima imaju raspoređen tačno propisani broj osnovnih sredstava i ljudi. U skladu sa vanrednim okolnostima, a prema nalogu investitora, od 02.02.2012. godine su angažirana dodatna sredstva i ljudi, te su svi magistralni putevi u zoni odgovornosti "Jata Group" bili prohodni, uključujući i neuralgične tačke, kao što su prevoji na cesti M-18 Ban Brdo i Karaula.

Izvršena je inspekcija svih putnih pravaca, te je konstatovano:

- na terenu je angažiran dovoljan broj osnovnih sredstava i ljudi;
- saobraćaj se odvija bez zastoja;
- trenutno stanje ceste je u skladu sa članom 79. Pravilnika o održavanju cesta;
- firma u rezervi ima još sredstava specijalizovane namjene, koja se mogu angažirati po potrebi.

Također je navedeno da će ispuniti sve obaveze kao i eventualne dodatne zahtjeve, te da će sve ceste u zoni odgovornosti "Jata Group" DOO Srebrenik i u narednom periodu biti u skladu sa članom 79. Pravilnika o održavanju cesta.

Dana 13.02.2012. godine zabilježene su nove snježne padavine na području TK, koje su u prosjeku iznosile oko 15 cm. Ukupna visina snježnog pokrivača izmjerena u Tuzli je iznosila 39 cm, u ostalim općinama je od 40-100 cm, a u visinskim predjelima i preko 120 cm. Svi putevi na Tuzlanskom kantonu su prohodni, uz otežano odvijanje saobraćaja, zbog novih snježnih padavina.

Vodostaj na brani HA Modrac dnevno se smanjuje za oko 10 cm, tako da je u 07,00 sati iznosio je 197,31 m.n.m., ispust kroz temeljne otvore brane je 16,2 m³/s.

Nema značajnijih prekida u napajanju električnom energijom i u telefonskim vezama. Termoelektrana Tuzla uredno se snadbijeva ugljem, na dopremi uglja sinhronizovano rade rudnici uglja sa područja Tuzlanskog kantona, Željeznice FBiH i Termoelektrana, uz podršku pripadnika Ministarstva unutrašnjih poslova i komunalnih preduzeća sa područja TK, koja omogućavaju prohodnost puteva.

Dana 14.02.2012. godine, PS Lukavac je primila obavijest da je u naselju Tumare, općina Lukavac, pronađeno beživotno tijelo A.M. iz Tumara. Operativnim radom na terenu i nalazom mrtvozornika službe hitne pomoći Lukavac, konstatovano je da nema tragova nasilja i da je smrt nastupila uslijed posljedica smrzanja. Tijelo je pronađeno u blizini doma kulture u naselju Tumare. Obzirom da nije bilo tragova nasilne smrti, Kantonalni tužilac, kao i obitelj preminulog, nisu tražili obdukciju

Volonteri Crvenog križa TK su u saradnji sa Općinskim organizacijama Crvenog križa, KŠCZ i OŠCZ realizirali brojne akcije pomoći najugroženijim porodicama i pojedincima.

Načelnik KŠCZ Zdenko Tadić i član KŠCZ Bego Gutić obavili su posjetu općini Živinice dana 14.02.2012. godine, gdje su se u razgovoru sa načelnikom općine Hasanom Muratovićem upoznali sa trenutnom situacijom u ovoj općini i poduzetim mjerama na ublažavanju posljedica prirodne nesreće.

Komandant KŠCZ Aziz Čačković i načelnik KŠCZ Zdenko Tadić obavili su posjetu općini Tuzla, gdje su se sreli sa načelnikom općine Jasminom Imamovićem i njegovim saradnicima i informirali se o situaciji u općini Tuzla.

Dana 14.02.2012. godine, došlo je do urušavanja krova na objektu farme pilića u MZ Vučkovci, općina Gradačac. Farma nije bila naseljena tako da je materijalna šteta pričinjena samo na krovnoj konstrukciji.

Četvrta vanredna sjednica KŠCZ održana je u utorak, 14.02.2012. godine sa početkom u 15,00 sati. Na sjednici je razmatran slijedeći dnevni red:

1. Izvodi iz zapisnika sa 3. vanredne sjednice KŠCZ
2. Upoznavanje i analiza stanja na terenu.
3. Izvještaj o realizaciji naredbi FŠCZ
4. Tekuća pitanja

Nakon vođene diskusije u kojoj je učestvovala većina prisutnih, zaključeno da se izdaju Naredbe proistekle po osnovu naredbi FŠCZ i aktuelnih potreba na terenu. KŠCZ je donio slijedeće **naredbe**:

"1. Naređuje se općinskim štabovima civilne zaštite da poduzmu sve odgovarajuće mjere na čišćenju puteva prema svim stočnim farmama te omogućavanje pristupa vodi i stočnoj hrani za farme na području svoje općine.

2. Osigurati pristupne puteve za sve proizvodno prehrambene objekte.

3. Osigurati pristupne puteve i drugim proizvodnim industrijskim objektima čija je proizvodnja od značaja za provođenje mjera zaštite i spašavanja.

4. Osigurati da veterinarske institucije poduzmu sve potrebne mjere u prevenciji i zaštiti zdravlja životinja."

"Zadužuju se OŠCZ da u saradnji sa direktorima osnovnih i srednjih škola i dekanima fakulteta Univerziteta u Tuzli poduzmu potrebne aktivnosti na raščišćavanju i odvozu snijega oko školskih i univerzitetskih objekata i poduzmu sve potrebne mjere da učenici i studenti ne bi bili ugroženi ledenicama i snijegom, koji može da se obruši sa krovova navedenih objekata uslijed topljenja snijega."

"Zadužuju se OŠCZ da u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća, poglavlje II – Prava i dužnosti građana, obavijeste građane putem medija i dostavom Dopune uputstva o rukovođenju akcijama zaštite i spašavanja, koje se dostavlja u prilogu, o njihovoj obavezi učešća u akcijama zaštite i spašavanja koje vode štabovi civilne zaštite i provođenju mjera lične i uzajamne zaštite kao i sankcijama ukoliko to ne učine."

"Zadužuju se OŠCZ da izvrše detaljnu analizu postojećih klizišta na području svoje općine i sačine listu klizišta sa visokim stepenom opasnosti po ljude i materijalna dobra, te istu dostave KŠCZ zajedno sa preventivnim mjerama koje je potrebno i koje planiraju poduzeti u otklanjanju navedene opasnosti."

"Zadužuju se OSCZ da izvrše detaljan pregled i analizu stanja lokalnih vodotoka i sačine informaciju sa pregledom preventivnih mjera koje je potrebno i koje planiraju poduzeti u cilju otklanjanja ili smanjenja opasnosti od poplava koje se očekuju ako dođe do brzog topljenja snijega."

"Zadužuju se OŠCZ, da u cilju otklanjanja posljedica velikih snježnih nanosa koji predstavljaju neposrednu opasnost po živote ljudi i urušavanje objekata, da svojim nadzorom zaduže pravna i fizička lica da poduzmu aktivnosti na utvrđivanju realnog rizika urušavanja i oštećenja i odmah pristupe uklanjanju snježnih nanosa i ledenica sa objekata koji su u njihovom vlasništvu, kako bi spriječili opasnost po sigurnost ljudi i materijalnih dobara.

Prilikom uklanjanja snijega i ledenica voditi računa da to rade osposobljena lica i uz poštivanje odgovarajućih sigurnosnih mjera za navedena lica koja se kreću oko objekta."

Načelnik KŠCZ je prezentirao Izvještaj o stepenu realizacije naredbi dobivenih od FŽCZ, sačinjenog po Naredbi FŠCZ. Nakon vođene diskusije u kojoj je učestvovala većina prisutnih Izvještaj je usvojen, i isti je prosljeđen prema FŠCZ.

KUCZ je postupajući po naredbi FŠCZ od 09.02.2012. godine, sačinila Informaciju o prikupljanju, raspodjeli i korištenju sredstava Posebne naknade za zaštitu od prirodnih i drugih nesreća, na području TK u periodu 2004.-2011. godina, te istu prosljedila FŠCZ.

Prema podacima HMS Bukovčići - Tuzla, temperatura izmjerena 15.02.2012. u 07,00 sati iznosila je -16°C , visina snježnog pokrivača 34 cm. Vodostaj na brani HA Modrac iznosio je 197,10 m.n.m. , ispusť kroz temeljne otvore je $16,2\text{ m}^3/\text{s}$.

Uslijed djelimične normalizacije vremenskih prilika, po naredbi KŠCZ Tuzla, na području TK započete su aktivnosti na uklanjanju ledenica sa krovova koje prijete sigurnosti prolaznika. Također, provode se aktivnosti na čišćenju pješačkih staza i prilaza školama i odvoza snijega van gradskih područja kao i pripreme u slučaju naglog topljenja snijega i pojave poplava.

Potpredsjednik Federacije BiH, gospodin Svetozar Pudarić je 15.02.2012. godine obavio radnu posjetu OŠCZ Lukavac te se upoznao sa aktuelnom situacijom na području ove općine.

Kantonalna komisija za procjenu šteta, koja je aktivirana sa proglašenjem stanja prirodne nesreće, održala je 2. sastanak na kojem je razmatrala zahtjeve općinskih načelnika za dodjelu hitne finansijske pomoći općinama Sapna, Banovići, Čelić, Kladanj, Živinice, Doboj Istok i Srebrenik. Zbog specifičnosti prirodne nesreće i pripremljenosti općina za zimsko održavanje lokalnih puteva, koji su u njihovoj nadležnosti i mogućnosti pružanja prvog odgovora od pravnih lica, sa kojima je ugovoreno zimsko održavanje lokalnih puteva, Komisija je predložila KŠCZ da se ne dodjeljuje pomoć za hitne intervencije, nego da se jednokratna novčana pomoć za saniranje posljedica od strane KŠCZ i Vlade TK dodijeli poslije konačne procjene štete i podnesenih zahtjeva u skladu sa propisanom procedurom.

Tokom noći 16./17.02.2012. godine palo je u prosjeku oko 10 cm novog snijega, tako da je u Tuzli zabilježena visina snježnog prekrivača od 42 cm. Nove snježne padavine uzrokovale su otežano odvijanje saobraćaja, naročito na planinskom prevoju Karaula, na putu Kladanj-Olovo, gdje je za vozila sa prikolicom i šlepere bila obavezna upotreba lanaca. Svi magistralni i regionalni putevi su bili prohodni.

Komandant KŠCZ Aziz Čačković i načelnik KŠCZ Zdenko Tadić, prisustvovali su (17.02.2012. godine) tematskoj sjednici Federalnog štaba civilne zaštite u Sarajevu. Na sjednici je razmatran slijedeći dnevni red:

1. Razmatranje dobivenih analiza o stepenu izvršenja naredbi FŠCZ.
2. Analiza stanja, poduzete mjere, procjena sa prijedlogom narednih mjera koje će se preduzimati u saniranju nastalih šteta.
3. Način saniranja šteta i obezbjeđenje sredstava za te namjene.

Kroz strukture Crvenog križa u BiH i u saradnji sa drugim organizacijama i donatorima, a preko Crvenog križa TK, osigurana je slijedeća humanitarna pomoć: 100 paketa hrane, (osigurano je u saradnji sa Merhametom iz Tuzle), 30 paketa (CK FBiH), 213 ćebadi (CK BiH), 13 paketića lijekova koji se mogu koristiti bez ljekarskog nadzora (analgetici i antipiretici - CK F BiH), 360 l mlijeka (CK FBiH), 310 kg hljeba (Pekara „Kabil“ iz Tuzle), 450 paketa hrane i higijene (Švicarski CK), 100 m³ ogrevnog drveta ("Ramex" Kladanj).

Pored navedenih roba, organizacije CK općina Tuzlanskog kantona prikupile su značajne količine hrane, higijenskih sredstava i ogreva, što se vidi iz pregleda aktivnosti koji je sačinjen na osnovu prispjelih izvještaja općinskih organizacija CK Tuzlanskog kantona.

U periodu od 17.02.2012. do 20.02.2012. godine nisu zabilježene nove snježne padavine, a porast dnevne temperature uzrokovao je topljenje snijega, tako da je 20.02.2012. godine zabilježena visina snježnog prekrivača od 23 cm. Međutim, topljenje snijega nije uzrokovalo značajan porast nivoa vodotoka na području TK. Vodostaj na brani HA Modrac u 07,00 sati iznosio je 196,49 m.n.m., a ispusit kroz temeljne otvore je 14,3 m³/s.

Nove snježne padavine tokom 20.02. i 21.02.2012. godine nisu uzrokovale značajnije probleme u odvijanju saobraćaja, niti u snabdjevanju električnom energijom.

Dana 20.02.2012. godine, oko 09,50 sati, na njivi kod mjesnog groblja u MZ Krtova 1, općina Lukavac, pronađeno je beživotno tijelo muškarca starog 53 godine. Obdukcija obavljena od strane sudskog vještaka medicinske struke je pokazala da je smrt nastupila uslijed smrzavanja.

Dana 19.02.2012. godine mehanizacija sa posadom koja je bila angažirana po Naredbi KŠCZ na području HNK, u općini Konjic, vratila se u Doboj Istok.

Stručni tim Ministarstva zdravstva za zaštitu zdravlja stanovništva TK održao je 20.02.2012. godine sastanak na kojem je razmatran dopis Ministarstva zdravstva FBiH, gdje se traži hitno postupanje u pripremi mjera zaštite i spašavanja od poplava. Nakon rasprave su doneseni zaključci:

1. Da se proslijedi dopis Federalnog ministarstva zdravstva svim zdravstvenim ustanovama na području TK na postupanje.

2. U toku izrade plana mjera i zaštite spašavanja od poplava zdravstvene ustanove mogu da ostvare kontakte i osiguraju pomoć i podršku OŠCZ.

3. Stručni tim Ministarstva zdravstva za zaštitu zdravlja stanovništva TK se obavezuje da organizuje sastanak najdalje do 15. marta 2012. godine sa ciljem objedinjavanja planova mjera i zaštite i spašavanja od poplava zdravstvenih ustanova TK na kojem će osim predstavnika zdravstvenih ustanova TK prisustvovati predstavnici KUCZ, KŠCZ, Ministarstva poljoprivrede, vodoprivrede i šumarstva TK i predstavnici Stručnog tijela Federalnog ministarstva zdravstva i FUCZ.

Dana 21.02.2012. godine, održan je 1. sastanak direktora KUCZ sa rukovodiocima Općinskih službi civilne zaštite, na kojem je razmatran slijedeći dnevni red:

1. Izvod iz zapisnika sa 6. sastanka direktora KUCZ sa rukovodiocima općinskih službi civilne zaštite u 2011. godini.
2. Informacija o aktivnostima u oblasti zaštite i spašavanja na području Tk.
3. Izvještaj o realizaciji i provedbi naredbi FŠCZ i KŠCZ.
4. Tekuća pitanja.

Na sastanku je razgovarano o problematici, aktivnostima i funkcionisanju sistema zaštite i spašavanja na području općina TK, za vrijeme proglašenja stanja prirodne nesreće. Nakon konstruktivne diskusije, u kojoj su učešće uzeli svi prisutni, donijeti su odgovarajući zaključci.

Odluku o prestanku stanja prirodne nesreće uzrokovane velikim snježnim padavinama i niskim temperaturama donijeli su općinski načelnici općine Banovići (dana 20.02.2012. godine) i Sapna (21.02.2012. godine) i Čelić (22.02.2012. godine), na prijedlog OŠCZ.

Prema podacima Hidrometeorološke stanice Bukovčić - Tuzla, temperatura izmjerena u 07,00 sati dana 22.02.2012. godine iznosila je 1°C, visina snježnog pokrivača 22 cm.

Vodostaj na brani HA Modrac u 07,00 sati je iznosio 196,42 m.n.m. i u odnosu na mjerenje prethodnog dana nivo je niži za 2 cm, ispušt kroz temeljne otvore je 4,5 m³/s. Vodotoci na području TK su u svojim koritima i trenutno nema opasnosti od pojave poplava i izlivanja vodotoka.

Peta vanredna sjednica KŠCZ održana je u srijedu, 22.02.2012. godine sa početkom u 10,00 sati. Na sjednici je razmatran slijedeći dnevni red:

1. Izvod iz Zapisnika sa 4. vanredne sjednice KŠCZ
2. Upoznavanje i realizacija novih naredbi FŠCZ
3. Prijedlog Odluke o prestanku stanja prirodne nesreće na području TK uzrokovane velikim snježnim padavinama i niskim temperaturama
4. Informacija o poduzetim aktivnostima u vrijeme proglašenja stanja prirodne nesreće na području TK uzrokovane velikim snježnim padavinama i niskim temperaturama, u periodu od 05.02. do 22.02.2012. godine
5. Tekuća pitanja

Nakon što su usvojili Zapisnik sa 4. vanredne sjednice, članovi KŠCZ su upoznati sa naredbama FŠCZ koje su donijete u periodu između dvije sjednice KŠCZ, te je štab donio slijedeću naredbu:

"Zadužuje se Ministarstvo poljoprivrede, vodoprivrede i šumarstva TK da hitno pristupi izradi Kanotnalog operativnog plana odbrane od poplava, u skladu sa članom 17. Uredbe o vrstama i sadržaju planova zaštite i spašavanja od štetnog djelovanja voda („Službene novine Federacije BiH“, broj: 26/09)."

Razmatrajući sprovođenje naredbe koju je KŠCZ donio 14.02.2012. godine, a koja se odnosi na analizu postojećih klizišta u općinama, KŠCZ je donio dopunu Naredbe:

"Zbog toga što većina OŠCZ nije dosljedno postupila po Naredbi Kantonalnog štaba civilne zaštite broj: 02724-44-2198-15/12 od 14.02.2012. godine, KŠCZ donosi dopunu navedene Naredbe, kojom se općinskim štabovima civilne zaštite dostavlja Preporuka za sprovođenje preventivnih mjera za spriječavanje i ublažavanje negativnih posljedica klizanja i odronjavanja zemljanih i stijenskih masa tokom snježnih padavina, koju je usvojio FŠCZ svojom Odlukom broj: 11-49/1-290/2012 od 20.02.2012. godine, i naređuje da Izvještaj o realizaciji dostave KŠCZ."

Tokom rasprave o problemu klizišta na području TK, KŠCZ je donio Zaključak:

"Zbog naglašene i stalno prisutne opasnosti od klizanja tla na području TK, potrebno je hitno pristupi aktivnostima na izradi općinskih katastara klizišta, kako bi se mogla tražiti odgovarajuća rješenja za saniranje postojećih klizišta i spriječila gradnja objekata u područjima koja su sklona klizanju tla. Za realizaciju navedene aktivnosti zaduženi su općinski načelnici, kao izvršna vlast na području općine. Ministarstvo prostornog uređenja i zaštite okolice Tuzlanskog kantona treba koordinirati navedene aktivnosti, te pristupiti izradi odgovarajućeg katastra klizišta Tuzlanskog kantona."

KŠCZ je donio Odluku da se Vladi TK preporuči da donese Odluku o prestanku stanja prirodne nesreće na području TK uzrokovane velikim snježnim padavinama i niskim temperaturama. Vlada TK je na vanrednoj sjednici usvojila navedenu Odluku, sa danom 22.02.2012.godine u 14,00 sati, čime se stavlja van snage Odluka o proglašenju stanja prirodne nesreće na području Tuzlanskog kantona uzrokovane velikim snježnim padavinama i niskim temperaturama od 05.02.2012.godine.

Razmatrajući Informaciju o poduzetim aktivnostima u vrijeme proglašenja stanja prirodne nesreće na području TK uzrokovane velikim snježnim padavinama i niskim temperaturama, u periodu od 05.02. do 22.02.2012. godine, KŠCZ je ocijenio da je navedeni dokument predstavlja radni materijal na koji članovi štaba treba da dostave primjedbe, kako bi se mogao uputiti Vladi TK na razmatranje.

ZAKLJUČNA RAZMATRANJA

Na osnovu detaljne analize aktivnosti koje su vođene u toku proglašenja stanja prirodne nesreće na području Tuzlanskog kantona može se zaključiti sljedeće:

1. Zbog velikih snježnih padavina i niskih temperatura praćenih visokim snježnim nanosima dana 03. i 04.02.2012. godine došlo je do potpune blokade saobraćaja na Kantonu Sarajevo, prekida saobraćaja na magistralnom putu M 17 od Konjica do Mostara i blokade života u Hercegovačko – Neretvljanskom, Zapadno – Hercegovačkom i Herceg – Bosanskom kantonu i djelimične blokade lokalnih puteva do brdskih i planinskih naselja na Tuzlanskom, Goraždanskom i Srednjo – Bosanskom kantonu, zbog čega je Vlada Federacije BiH na prijedlog Federalnog štaba civilne zaštite dana 04.02.2012. godine donijela Odluku o proglašenju stanja prirodne nesreće na području Federacije BiH uzrokovane velikim snježnim padavinama i niskim temperaturama.

2. Dana 25.01.2012. godine u općini Kladanj je proglašeno stanje prirodne nesreće a ista odluka je donesena i za općinu Tuzla 04.02.2012. godine i Sapna dana 05.02.2012. godine zbog čega je na prijedlog Kantonalnog štaba civilne zaštite Vlada TK na vanrednoj sjednici održanoj 05.02.2012. godine u 14 sati donijela Odluku o proglašenju stanja prirodne nesreće na području Tuzlanskog kantona uzrokovane visokim snježnim padavinama i niskim temperaturama.

3. Stanje prirodne nesreće zbog visokog snijega i niskih temperatura proglasile su općine Čelić 06.02.2012. godine, općina Živinice 07.02.2012. godine i općina Banovići 08.02.2012. godine.

Na općinama Doboj Istok, Gračanica, Gradačac, Kalesija, Lukavac, Srebrenik, Teočak nije proglašavano stanje prirodne nesreće od strane općinskih načelnika ali su općinski štabovi civilne zaštite, u skladu sa proglašenjem na razini Federacije BiH i TK, aktivirani i svo vrijeme aktivno sudjelovali u rukovođenju akcijama zaštite i spašavanja i provođenju naredbi FŠCZ i KŠCZ na svom području.

4. U vrijeme stanja prirodne nesreće KŠCZ je održao 5. vanrednih sjednica i u rukovođenju akcijama zaštite i spašavanja na području TK donio 14 naredbi, koje su gotovo u cjelosti realizirane od strane OŠCZ i pravnih lica u skladu sa utvrđenom dinamikom.

Od strane komadanta, načelnika i članova KŠCZ izvršen je obilazak svih 13 općina i upoznavanje sa stanjem i poduzetim mjerama od strane OŠCZ.

Također je obavljen obilazak rudnika uglja u Banovićima, Đurđeviku i Tuzli kao i TE Tuzla u cilju otklanjanja nastalih problema u dopremi uglja i osiguranja kontinuirane proizvodnje električne energije.

Jedna od vanrednih sjednica KŠCZ je održana sa menadžmentom JP "Spreča" na brani Hidroakumulacije Modrac i izvršeno usaglašavanje režima rada Hidroakumulacije i priprema za očekivani povećani priliv vode od topljenja snijega.

5. U toku proglašenog stanja prirodne nesreće osiguran je neprekidni rad Kantonalnog operativnog centra civilne zaštite i stalno dežurstvo državnih službenika u KUCZ.

6. Po proglašenju stanja prirodne nesreće, na prijedlog KŠCZ, Vlada TK je donijela Odluku o prekidu nastave od 05. 02. do 14.02.2012. godine.

7. U vrijeme stanja prirodne nesreće aktivirana je Kantonalna komisija za procjenu šteta na osnovu čijeg je prijedloga, poslije obrade zahtjeva za pomoć iz općine Kladanj, KŠCZ donio odluku o dodjeli jednokratne novčane pomoći za hitne intervencije u iznosu od 10.000,00 KM.

Zbog specifičnosti prirodne nesreće i pripremljenosti općina za zimsko održavanje lokalnih puteva, koji su u njihovoj nadležnosti i mogućnosti pružanja prvog odgovora od pravnih lica sa kojima je ugovoreno zimsko održavanje lokalnih puteva, Komisija je predložila KŠCZ da se ne dodjeljuje pomoć za hitne intervencije, nego da se jednokratna novčana pomoć za saniranje posljedica od strane KŠCZ i Vlade TK dodijeli poslije konačne procjene štete i podnesenih zahtjeva u skladu sa propisanom procedurom.

8. OŠCZ i OSCZ su kvalitetno i efikasno izvršili svoju funkciju propisanu Zakonom o zaštiti i spašavanju, u odgovoru na prirodnu nesreću, uspješno rukovodeći akcijama zaštite i spašavanja u interesu građana i njihove imovine na općini.

9. Izvođači radova na zimskom održavanju magistralnih, regionalnih i lokalnih puteva su uspješno obavili svoju ugovorom utvrđenu obavezu, a na općinama gdje je bilo potrebe OŠCZ su vršili dodatno angažiranje postojećih snaga i sredstava civilne zaštite u skladu sa svojom zakonskom nadležnošću.

10. Na osnovu naredbi FŠCZ obavljani su kontakti sa odgovornim licima iz civilne zaštite Konjica i Grada Mostara i donijeta je naredba KŠCZ na raščišćavanje magistralnog puta M-17, te je u Konjic upućen utovarivač sa posadom, dok su građevinske mašine koje su obezbjeđene kao pomoć Gradu Mostaru otkazane.

11. Za vrijeme trajanja prirodne nesreće došlo je do smrzavanja tri lica, od kojih dva na općini Lukavac i jedno na općini Banovići. Jedno lice je stradalo u požaru u obiteljskoj kući u općini Čelić.

12. Ministarstvo unutrašnjih poslova Tuzlanskog kantona je dalo veliki doprinos i vanrednim angažiranjem svojih pripadnika na terenu omogućilo veoma efikasno provođenje svih naredbi KŠCZ tako da se stanje prirodne nesreće u odvijanju putnog saobraćaja na području Tuzlanskog kantona nije značajnije osjetilo.

13. Rudnici uglja Tuzlanskog kantona u Banovićima, Đurđeviku i Tuzli i TE Tuzla su u veoma otežanim uvjetima proizvodnje zbog niskih temperatura dodatnim angažmanom menadžmenta i uposlenika osigurali redovno snabdijevanje električnom energijom Tuzlanskog kantona i Federacije BiH.

14. Pripadnici Crvenog križa Tuzlanskog kantona su sa predstavnicima KUCZ i OSCZ obavili dopremu paketa hrane, higijenskih sredstava i ogreva do velikog broja ugroženih građana na većini općina Tuzlanskog kantona.

15. Svi mediji koji djeluju na području TK su dali veliki doprinos u obavještanju građana i radu štabova civilne zaštite u rukovođenju poslovima zaštite i spašavanja za vrijeme prirodne nesreće.

PRIJEDLOG MJERA

Na osnovu obavljene detaljne analize stanja na terenu i poduzetih aktivnosti od strane KŠCZ i OŠCZ u rukovođenju akcijama zaštite i spašavanja, za vrijeme trajanja prirodne nesreće, za ukupno poboljšanje stanja potrebno je poduzeti sljedeće mjere:

1. U toku rukovođenja akcijama zaštite i spašavanja od strane općinskih i Kantonalnog štaba civilne zaštite uočeno je da jedan broj članova štabova civilne zaštite nije kvalitetno upoznat sa svojim obavezama i nadležnostima, zbog čega je potrebno provesti dodatnu obuku navedenih štabova.

Za provođenje navedene obuke odgovorna je KUCZ.

2. U toku pružanja odgovora na prirodnu nesreću uočeno je da općinske službe civilne zaštite u nekim općinama nisu kadrovski popunjene i formirane u skladu sa Zakonom o zaštiti i spašavanju jer nemaju status samostalne općinske Službe za upravu, nemaju u svom sastavu općinski operativni centar civilne zaštite i profesionalnu vatrogasnu jedinicu u skladu sa navedenim Zakonom.

Za provedbu navedenih zakonskih obaveza odgovorni su načelnici općina.

3. Za vrijeme trajanja prirodne nesreće većina građana i pravnih lica se nisu kvalitetno odazvali na čišćenje snijega ispred i sa objekata koje koriste što su po Zakonu o zaštiti i spašavanju bili dužni učiniti.

Navedeni nedostatak je potrebno ispraviti obukom građana i predstavnika pravnih lica.

4. Izostala je i reakcija nadležnih inspeksijskih službi u sankcioniranju građana i pravnih lica koji nisu izvršavali svoje obaveze iz Zakona o zaštiti i spašavanju i općinskim Odlukama o komunalnom redu.

Za otklanjanje uočenog nedostatka potrebno je obaviti sastanak i otklanjanje uočenog nedostatka sa općinskim i Kantonalnom upravom za inspeksijske poslove.

5. Nakon procjene šteta od strane općinskih komisija potrebno je u skladu sa propisanom procedurom, Kantonalne komisije za procjenu šteta pripremi prijedlog za dodjelu pomoći iz sredstava posebne naknade za zaštitu od prirodnih i drugih nesreća kojima raspolaže KŠCZ i tekuće budžetske rezerve kojom raspolaže Vlada TK.

Nakon toga ako to bude bilo potrebno, potrebno je pripremiti zahtjev za FŠCZ i Federalnu Vladu za dodjelu pomoći za saniranje posljedica šteta.

6. S obzirom da je opasnost od poplava stalno prisutna na većem dijelu Tuzlanskog kantona potrebno je da Ministarstvo poljoprivrede, šumarstva i vodoprivrede hitno pristupi izradi Kantonalnog operativnog plana odbrane od poplava, u skladu sa članom 17. Uredbe o vrstama i sadržaju planova zaštite id štetnog djelovanja voda („Službene novine Federacije BiH“, broj: 26/09).

7. Zbog naglašene i stalno prisutne opasnosti od klizanja tla na općinama Tuzlanskog kantona i pojave klizišta potrebno je hitno pristupi aktivnostima izrade općinskih katastara klizišta kako se u regulacionim planovima ne bi planirala gradnja objekata na takvim područjima i mogla tražiti odgovarajuća rješenja za saniranje postojećih klizišta.

Za realizaciju navedene aktivnosti zaduženi su općinski načelnici kao izvršna vlast na području općine

Ministarstvo prostornog uređenja i zaštite okolice Tuzlanskog kantona treba koordinirati navedene aktivnosti i kada se one završe pristupiti izradi odgovarajućeg katastra klizišta Tuzlanskog kantona.

8. Za ostvarene efikasnije operativne funkcije KŠCZ potrebno je sa FŠCZ analizirati kvalitet ostvarenog odgovora za vrijeme trajanja prirodne nesreće i otkloniti uočene slabosti.

Posebno preispitati potrebu da se naredbe FŠCZ istovremeno upućuju i KŠCZ i OŠCZ jer to dodatno opterećuje rukovođenje akcijama zaštite i spašavanja i smanjuje efikasnost odgovora i tražiti od FŠCZ da u slučaju proglašenja stranja prirodne nesreće svi dokumenti FŠCZ za općinske strukture zaštite i spašavanja idu preko KŠCZ.

9. Potrebno je da subjekti koji su imenovani Programom rada za izradu Plana zaštite i spašavanja ljudi i materijalnih dobara od prirodnih i drugih nesreća na području Tuzlanskog kantona koji je donijela Vlada TK, hitno dostave tražene podatke kako bi KUCZ mogla završiti izradu navedenog Plana.

10. Na osnovu ostvarenog uvida u planirana budžetska sredstva općina i Kantona za prevenciju i saniranje šteta od prirodnih i drugih nesreća, može se zaključiti da se radi o veoma malim sredstvima i potrebno je da se u budžetima za 2012. godinu planira više sredstava.

Potrebno je u budžetu općina i Kantona svake godine planirati posebnu budžetsku poziciju namijenjenu za pomoć u saniranju šteta od prirodnih i drugih nesreća u skladu sa preporukama Vlade Federacije BiH.

11. U odgovoru na prirodnu nesreću nisu učestvovala obučena i opremljena jedinice civilne zaštite opće namjene jer još uvijek nije donesen propis iz člana 148. Zakona o zaštiti i spašavanju o sadržaju i načinu vođenja evidencije i kriterijima za raspoređivanje obveznika civilne zaštite u strukture civilne zaštite.

Potrebno je da direktor FUCZ hitno donese navedeni propis kako bi se to što je moguće prije ispravilo.

Komandant KŠCZ

Aziz Čačković